

RAPÒRT RESUMÍ

Resúmen

Kontraloria General di Kòrsou a hasi un investigashon di e prosedimentunan di kontrol interno relashoná ku entrega di pasport i reibeweis di aña 2018. Motibu di e investigashon akí ta ku a konstatá sierto iregularidat den e añanan anterior na e organisashon di Asuntunan Públiko i sierto defisiensi den kontrol interno di e entradanan ku e organisashon akí ta risibí pa entrega di pasport i reibeweis. E entradanan en kuestion mester keda depositá na un manera kompleto, korekto i na tempu den kaha di Pais. Pa evitá iregularidat relashoná ku e entradanan akí, mester apliká medida di kontrol interno na e prosesonan en kuestion. P'esei, Kontraloria a hasi un investigashon tokante e siguiente pregunta:

'Ta aplikando medida di kontrol interno na e proseso di entrega di pasport i reibeweis pa asina evitá iregularidat relashoná ku e entradanan risibí?'

Kontesta riba e pregunta akí ta: Nò.

E medidanan di kontrol interno no ta kumpli ku e sinku kriterionan di bon kontrol interno ku COSO (un modelo di referensia standart ku ta ser usá pa evaluá kontrol interno) ta rekomendá. E ambiente di kontrol, e medidanan di kontrol interno i e komunikashon ku e personal konserní tokante regla i prosedimentu no ta adekuá. Ademas, no ta hasi análisis di rísiko i no ta vigilé si e medidanan di kontrol interno ta funshoná debidamente. Por ehèmpel, no tin kontrol (visibel) ta tuma lugá di e entrada risibí pa entrega di pasport, ni no ta aplikando e separashon di funshon ku mester tin entre e empleado públiko ku mester duna kuenta (di maneho di e entradanan) i esun ku mester kontrol'é (kontroladó interno). Ademas, mester tin un kontrol diario di e entradanan generá pa entrega di reibeweis i esei no ta tumando lugá.

Debí na e situashonnan konstatá, no ta sigur ku e entradanan registrá na entrega di pasport i reibeweis na aña 2018 na balor di NAf 4,5 mion, a ser depositá kompleto, korekto i na tempu den kaha di Pais. Tambe ta eksistí e rísiko ku sierto iregularidat den e entradanan akí no ta ser detektá (na tempu). E rapòrt akí ta kontené diferente rekomendashon pa mitigá e rísikonan menshoná.

Ta rekomendá Parlamento pa urgentemente pidi e minister responsabel fiha un plan ku ta bisa pa ki fecha, den transkurso di aña 2020, lo mester implementá e diferente rekomendashonnan. Ademas, ta rekomendá Parlamento pa supervisá implementashon di e plan akí estriktamente.